



Inatsisartunut ilaasortaq Jens Immanuelson, Siumut
Inatsisartut
/MAANI

Qullukkat pillugit § 37 naapertorlugu apeqquteqaammut nr. 2013-096-imut akissuteqaat

Inatsisartut Suleriaasianni § 37, imm. 1 naapertorlugu apeqqutigisimavat Naalakkersuisut pilersaaruteqarnersut immikkut ittumik qaleralittassanik agguassinissamut qullukkanik tunisassiornermi atorpeqartussanik. Apeqqut uannut akisassanngorlugu innersuutigineqarsimavoq.

Apeqqut:

Naalakkersuisut pilersaaruteqarpat immikkut ittumik qaleralittassanik agguassiniarlutik qullukkanik tunisassiorsinnaaneq siunertaralugu?

Akissut:

Ilisimatitsissutigisinnaavara, Naalakkersuisut maannakkorpiaq pilersaaruteqanngimmata 2013-imi qullukkanik tunisassiorsinnaanissaq siunertaralugu immikkut ittumik qaleralittassanik agguassinissaminnik.

Kalaallit Nunaanni nunaqarfiit ingerlatseqatigiiffiillu ikittuinnaat, qullukkanik tunisassiorartuupput. Taamaattumik qaleralittassanik ingerlatseqatigiiffinnut taakkunungaannaq agguassineq tamanut assigiimmik periuseqarnissamut akerliussaaq. Tamanut assigiimmik periuseqarneq eqquutsinneqassappat, nunami aalisakkeriviit tamarmik assersuutigalugu Qeqertarsuup Tunuaniittut immikkut pisassiissutinik tunineqartariaqassapput. Ilanngullugu immikkoortunut ataasiakkaanut immikkut pisassiissutinik agguassineq equngasumik unammillertitsisutut sunniuteqassaaq taamaattumillu imatut taagorneqartartumik kinguneqassalluni "unioqutsitsisumik naalagaaffimmit tapiiffigineqarneq". Naalakkersuisunit aalisakkanut il.il. tunisisitsinermi akitigut killeqanngitsumik unammillertoqarnissaq tapersersorneqarpoq. Taamaattumik Naalakkersuisut siunertarinngilaat akulerutissallutik immikkullu ittunik pisassiissutinik aalajangersaassallutik, tamakku taamaallaat aalisartunit sumiiffinnut aalajangersimasunut akikinnerutillugit tulaassinnaasassaat. Ingerlatseqatigiiffiit qullukkanik tunisassiorusukkunik, taava tunisassiorut tamakku, aalisartut sumiiffinni allani pissarsiarisinnaasassaat aki akilertariaqarpaat. Aalisartut ataasiakkaat soorunami tamatigut aalisagaatiminnik tulaassiniartassapput, tassani iluanaaruteqarnissaq annertunerpaassappat. Taamaasilluni uannit isigalugu apeqqummi pineqanngilaq tunisassiassanik qullukkanik tunisassiorsinnaanissamut amigaateqarneq, kisiannili tunitsivinni akit imatut inissimasut, tamakku kingunerisarlugi aalisartunit pisat siunertanut allanut tunineqartarnissaat toqqarneqartarluni.

Inussiarnersumik inuulluaqqusillunga

Karl Lyberth
Aalisarnermut, Piniarnermut Nunalerinermullu Naalakkersuisoq

24-06-2013
Suliap nr. 2013-085270
Dok. nr. 1243889

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-mail: apnn@nanoq.gl
www.nanoq.gl